

■ COLUMNA

Maiorz u proporz senza fin?


DA GIUSEP NAY

La dretgira administrativa dal Grischun n'è danovamain betg entrada materialmain sin il recurs encunter l'elecziun dal cussegl grond tenor il sistem da maiorz. Ella n'ha pia betg giuditgà sche tal è conform a nossa Constituziun federala u betg. Quai è succedi, sco gia l'emprima giada, d'ina vart muort sbagls formals dals recurrents, da l'autra vart omaduas giadas dentant essenzialmain perquai che la dretgira n'haja tenor il dretg grischun betg la cumpetenzza da decider quai.

Stringenta n'è quella decisiun betg. Ni la constituziun ni la lescha sur la dretgira administrativa excludan quella cumpetenzza cleramain. Cunzunt na violass i betg la separaziun da las pussanzas, sco quai che la dretgira administrativa scriva en sia decisiun, d'admetter sia cumpetenzza. Il dretg chantunal cunterfa il cuntrari a quella, sche betg las dretgiras, sco la terza pussanza en il stadi, han il dretg da procurar ch'il dretg en vigur vegnia respectà en tuts cas. Quella essenza d'in stadi da dretg è bain pauc enconuschenta, na sa e na duai dentant betg vegnir approfondida qua.

Cun la decisiun chantunala recenta è uss dal tut cler ch'ils recurrents san sa volver directamain a la dretgira federala. Quels han, prevesend endretg che la dretgira grischuna savess decider uschia, gia ordavant fatg quai. Qua tras sa Losanna uss decider sch'il maiorz cun ils circuls electorals vertents è conform cun la Constituziun federala u betg.

La Constituziun federala garanteschia il medem



dretg da burgaisas e burgais d'eleger e da votar. Essenzial per nossa democrazia directa è il principi: ina persuna ina vusch cun adina la medema meisa. Pervia da la zunt differenta grondezza dals circuls electorals en il Grischun n'è quai enconuschentamein betg il cas. La dumonda è sch'il maiorz è tuttina conform a la Constituziun federala u sch'i dat motivs preponderants per la gronda disparitad quantas vuschs ch'i dovra per in mandat. Avras p. ex. 160, Churwalden dentant 1918.

La gronda impurtanza istorica dals vegls circuls en il Grischun na sa vairamein betg pli vegnir fatga valair suenter che quels circuls èn vegnids abolids e n'han nagina altra funcziun pli che quella da circuls electorals. La partiziun dal chantun en tals en vigur è oz arbitraria, in pau uschia sco en ils Stadis Unids da l'America nua che l'uschenumnà Gerrymandering lubescha a las partidas politicas da trair ils cunfins da quels tut tenor lur interess da partida. Quai demussan la mancanza d'ina basa legala chantunala stringenta per la repartiziun vertenta ed il meglier dus exempels concrets.

La lescha chantunala sur la partiziun dal chantun en circuls è abolida. Sulettamain en in'annexa tar la lescha sur il cussegl

grond vesan ins oz tge vischnancas che tutgan tar tge circul electoral. E quella repartiziun ha savì vegnir ed è vegnida midada pliras giadas entras singulas vischnancas en contracts da fusiun ed uschia senza ch'il suveran grischun haja da dir insatge. Quai è nundemocratic e l'arbitraritad che seresulta illustrescha ils dus cas sequents.

Breil na tutga betg pli tar la Cadi, mabain tar il circul da Rueun che cumiglia mo pli quella vischnanca suenter sia fusiun cun Andiastr e Vuorz e da las autras cun vischnancas en auters circuls. Maurus Tomaschett da Breil, fin qua deputà da la Cadi, vegn uschia a savair vegnir reelegì senza concorrenza en il nov circul electoral.

Reto Crameri da Surava, fin qua deputà dal circul Belfort, vegn strusch a savair candidar en il circul d'Alvaschagn, dal qual sia vischnanca fa da nov part suenter ina fusiun cun la nova vischnanca Alvra. Là en ils dus posts occupads cun deputads or da vischnancas originaras da quel circul. El sa tenor dretg malgrà ses domicil a Surava e sto bain candidar vinavant en il circul da Belfort, era sche sia vischnanca n'appartegn betg pli a quel. Quel circul consista mo pli da Lantsch e Schmitten, duas vischnancas gnanc cunfinantas. In candidat da Lantsch en quella situaziun savess dentant esser ina gronda concorrenza per il candidat ordeifer il circul.

Amintgina e mintgin sa giuditgar sch'è bain ils circuls istorics san anc esser vinavant in motiv preponderant per violar cun il maiorz il dretg egual d'eleger da tuts.